

- (2) U slučaju da imenovano lice, po isteku perioda iz stava 1. tačka f) ovog člana nastavi obnašati funkciju, a o tome ne bude donesena posebna odluka/rješenje koja bi podliježala unosu podataka u Registar, Institucija je dužna odmah, a najkasnije u roku od 7 dana od datuma kraja obnašanja funkcije u pisanoj formi obavijestiti Ured o navedenom.

Član 6.

(Obaveza unosa podataka)

- (1) Institucije iz člana 2. ove Odluke dužne su u roku od 10 dana od dana izvršenog imenovanja dostaviti Uredu podatke navedene u članu 5. stav (1) ove Odluke, a sve do uspostave neposrednog načina unosa.
- (2) Nakon uspostave neposrednog načina unosa podataka u Registar, ovlaštene osobe u Registar unose podatke o imenovanim licima u roku od 10 dana od dana izvršenog imenovanja.
- (3) Institucije iz člana 2. ove Odluke dostavljaju, na službeni e-mail Uredu, akte (rješenje, odluka ili drugi akt) kojim se dokazuje datum početka i kraja obnašanja imenovane funkcije, u roku od 10 dana od dana izvršenog imenovanja, a ukoliko imenovanje vrši drugi organ, u roku od 10 dana od dana dostavljanja akta o imenovanju Instituciji.
- (4) Institucije iz člana 2. ove Odluke dostavljaju Uredu akte iz člana 5. stav (1) tačke n) i p) na način i u rokovima iz stava (3) ovog člana.
- (5) Nepostupanje u skladu sa odredbama iz stava (1) ovoga člana predstavlja tešku povredu službene dužnosti, odnosno tešku povredu radne obaveze.

Član 7.

(Obim i mjera obrade)

Podaci o imenovanim licima iz člana 5. ove Odluke mogu se obrađivati u obimu i mjeri koji je neophodan za ostvarenje svrhe iz člana 3. ove Odluke.

Član 8.

(Vremenski period obrade)

- (1) Podaci o imenovanim licima iz člana 5. stav (1) ove Odluke obrađuju se za vrijeme trajanja perioda imenovanja, odnosno godinu dana nakon isteka perioda imenovanja, razrješenja, odstupanja sa imenovane funkcije ili drugog načina prestanka obnašanja imenovane funkcije.
- (2) U slučaju da imenovano lice, bez donošenja posebne odluke/rješenja, ostane na imenovanoj funkciji nakon isteka perioda imenovanja, podaci će se obrađivati za period faktičkog obnašanja imenovane funkcije i godinu dana računajući od dana odstupanja sa imenovane funkcije.
- (3) Period obrade podataka može se mijenjati u slučaju da se promijene zakonski ili podzakonski propisi koji tretiraju predmetnu oblast.

Član 9.

(Autentičnost i tačnost unesenih podataka)

- (1) Za autentičnost i tačnost Uredu dostavljenih, a nakon uspostave neposrednog načina unosa, unesenih podataka o imenovanim licima, odgovorne su Institucije iz člana 2. ove Odluke u kojima je izvršeno imenovanje.
- (2) O pogrešno ili netačno dostavljenim podacima za unos u Registar, Institucije iz člana 2. ove Odluke dužne su obavijestiti Ured odmah, a najkasnije 7 dana po saznanju, te u istom roku ispravljene dostaviti Uredu.
- (3) Nakon uspostave neposrednog načina unosa podataka u Registar, odgovornost za tačnost i istinitost podataka unesenih u Registar isključivo je na Institucijama iz člana 2. Odluke i licima ovlaštenim za unos podataka u Registar, imenovanim od strane Institucija.

Član 10.

(Izmjena, čuvanje i korištenje podataka)

- (1) Ured vrši obradu svih prikupljenih podataka koje dostave ili unesu Institucije iz člana 2. Odluke, i javno objavljuje na web stranici informacionog sistema Ureda.

- (2) Svaka izmjena unesenih podataka može se vršiti na osnovu pismenog zahtjeva Institucije iz člana 2. Odluke i Vlade Kantona Sarajevo.
- (3) Podaci koji se u Registar unose na način predviđen u članu 4. stav (2) ove Odluke čuvaju se i štite u skladu sa posebnim propisima.

Član 11.

(Preuzimanje podataka)

- (1) Danom stupanja na snagu ove Odluke Ured preuzima podatke o imenovanim licima i ovlaštenim osobama za dostavu i unos podataka o imenovanim licima koji su prikupljeni po osnovu Odluke o Registru imenovanih lica u Kantonu Sarajevo ("Službene novine Kantona Sarajevo", broj 42/18).
- (2) Podaci o imenovanim licima objavljeni na internet stranici Vlade Kantona Sarajevo (<https://il.ks.gov.ba>) brišu se nakon potpune uspostave i objave podataka o imenovanim licima iz člana 5. stav (1) ove Odluke na web stranici Informacionog sistema Ureda, a o čemu će Ured pisanim putem obavijestiti Zavod za informatiku i statistiku Kantona Sarajevo.

Član 12.

(Nadzor nad primjenom Odluke)

- (1) Odredbe ove Odluke obavezno se primjenjuju na sve Institucije iz člana 2. Odluke.
- (2) Nepostupanje po odredbama ove Odluke predstavlja tešku povredu službene dužnosti, odnosno tešku povredu radne obaveze i kao takvo može biti osnov za pokretanje postupka utvrđivanja odgovornosti i poduzimanje mjera od strane poslodavca i/ili Vlade Kantona Sarajevo kao predstavnika osnivača Institucija.
- (3) Nadzor nad primjenom Odluke vrši Ured.

Član 13.

(Stavljanje van snage ranije Odluke)

Stupanjem na snagu ove Odluke stavlja se van snage Odluka o Registru imenovanih lica u Kantonu Sarajevo ("Službene novine Kantona Sarajevo", broj 42/18).

Član 14.

(Stupanje na snagu Odluke)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-21309-25/19

23. maja 2019. godine
Sarajevo

Premijer
Edin Forto, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo, na 21. sjednici održanoj 23.05.2019. godine, donijela je

ODLUKU

**O IZMJENAMA ODLUKE O REGISTRU ZAPOSLENIH
U JAVNOM SEKTORU NA PODRUČJU KANTONA
SARAJEVO**

Član 1.

(Izmjena člana 5.)

U Odluci o Registru zaposlenih u javnom sektoru na području Kantona Sarajevo ("Službene novine Kantona Sarajevo", broj 09/19) član 5. mijenja se i glasi:

"Član 5.

(Sadržaj podataka u Registru)

- (1) Svi organi uprave i institucije iz člana 2. ove Odluke dostavljaju Uredu za borbu protiv korupcije i upravljanje kvalitetom Kantona Sarajevo (u daljem tekstu: Ured) sljedeće podatke o zaposlenim licima:
 - a) ime i prezime,
 - b) naziv i sjedište organa uprave/institucije u kojem je lice zaposleno,
 - c) naziv radnog mjesta,
 - d) stručna sprema za radno mjesto,

- e) stručna sprema lica iz tačke a) ovog stava,
 - f) zvanje lica iz tačke a) ovog stava stečeno redovnim, vanrednim i drugim oblicima obrazovanje,
 - g) datum zasnivanja radnog odnosa na neodređeno vrijeme,
 - h) datum prestanka radnog odnosa na neodređeno vrijeme,
 - i) datum zasnivanja radnog odnosa na određeno vrijeme,
 - j) datum prestanka radnog odnosa na određeno vrijeme,
 - k) osnovna plata lica iz tačke a) ovog stava.
- (2) Dostava i unos podataka u Registar vrši se na osnovu isprava o zaposlenim licima i ostale dokumentacije, a što je odgovornost organa uprave i institucija iz člana 2. ove Odluke."

Član 2.

(Izmjena člana 6. st. (1) i (2))

U članu 6. st. (1) i (2) mijenju se i glase:

- "(1) Podatke iz člana 5. Odluke organi uprave i institucije dostavljaju Uredu radi unosa (evidentiranja) u Registar, sve do uspostave neposrednog načina unosa podataka o zaposlenim licima od ovlaštenih osoba organa uprave i institucija u kojima je lice zaposleno.
- (2) Organi uprave i institucije iz člana 2. Odluke dužne su imenovati ovlaštene osobe za dostavu i unos podataka o zaposlenim licima u Registar, nakon uspostave neposrednog načina unosa podataka iz stava (1) ovog člana, koje će imati posebne korisničke šifre za unos. Kod organa uprave i institucija iz člana 2. Odluke gdje se centralizovano vode podaci o zaposlenim licima u drugom organu, taj organ imenuje ovlaštene osobe za dostavu i unos podataka u Registar."

Član 3.

(Izmjena člana 7.)

Član 7. mijenja se i glasi:

"Član 7.

(Blagovremenost podataka)

- (1) Inicijalnu dostavu podataka Uredu o svim zaposlenim licima, organi uprave i institucije iz člana 2. Odluke izvršit će na Obrascu koji će im dostaviti Ured, te iste podatke dostaviti Uredu u roku od 30 dana od dana stupanja na snagu ove odluke.
- (2) Sve naredne dostave podataka o zaposlenim licima vršit će se na način predviđen članom 6. stav (1) i (2) ove odluke.
- (3) Lica iz člana 6. stav (2) Odluke obavezna su dostaviti Uredu, radi unosa u Registar, odnosno nakon uspostave neposrednog načina unosa, unijeti u Registar, podatke o novozaposlenom licu u roku od 10 dana od dana zasnivanja radnog odnosa na neodređeno i određeno vrijeme.
- (4) Sve promjene podataka o zaposlenim licima u organima uprave i institucijama ovlaštene osobe dostavljaju Uredu, odnosno unose u Registar u roku od 10 dana od dana izvršenih promjena.
- (5) Lica iz člana 6. stav (2) Odluke odgovorna su za tačnost i blagovremenost dostavljenih, odnosno unesenih podataka.
- (6) Nepostupanje u skladu sa odredbama ovog člana predstavlja težu povredu službene dužnosti, odnosno težu povredu radne obaveze."

Član 4.

(Izmjena člana 9. st. (1) i (2))

U članu 9. st. (1) i (2) mijenjaju se i glase:

- "(1) Na osnovu podataka organa i institucija iz člana 2. Odluke, Ured formira jedinstvenu bazu podataka o zaposlenim licima u javnom sektoru na području Kantona Sarajevo, objedinjujući podatke primjenom odgovarajućih parametara.
- (2) Tehničko uputstvo za unos podataka u Registar izradit će Ured i učiniti dostupnim putem Informacionog sistema Ureda."

Član 5.

(Izmjena člana 12.)

Član 12. mijenja se i glasi:

"Član 12.

(Autentičnost i tačnost unesenih podataka)

- (1) Za autentičnost i tačnost dostavljenih, odnosno nakon uspostave neposrednog načina unosa, unesenih podataka u Registar odgovorni su organi uprave i institucije iz člana 2. Odluke.
- (2) O pogrešno dostavljenim podacima za unos u Registar, ovlaštena lica iz člana 6. stav (2) dužna su obavijestiti Ured u roku od 5 dana od dana saznanja."

Član 6.

Član 13. mijenja se i glasi:

"Član 13.

(Izmjena, čuvanje i korištenje podataka)

- (1) Ured vrši objedinjavanje svih prikupljenih podataka i javno objavljivanje na web stranici Informacionog sistema Ureda.
- (2) Podaci u Registru čuvaju se i štite u skladu sa posebnim propisima."

Član 7.

(Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-21309-28/19

23. maja 2019. godine

Sarajevo

Premijer

Edin Forto, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i broj 37/14 - Ispravka) i člana 146. stav (3) Zakona o srednjem obrazovanju ("Službene novine Kantona Sarajevo", broj 23/17), Vlada Kantona Sarajevo, na 21. sjednici održanoj 23.05.2019. godine, donijela je

ODLUKU

**O DAVANJU SAGLASNOSTI ZA IMENOVANJE
DIREKTORICE JAVNE USTANOVE SREDNJA
ZUBOTEHNIČKA ŠKOLA SARAJEVO**

I

Daje se saglasnost Školskom odboru Javne ustanove Srednja zubotehnička škola Sarajevo, da se Elvira Jašarbašić, profesor pedagogije i psihologije, imenuje za direktoricu Škole.

II

Ova Odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-05-21309-4/19

23. maja 2019. godine

Sarajevo

Premijer

Edin Forto, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i broj 37/14 - Ispravka) i člana 146. stav (3) Zakona o srednjem obrazovanju ("Službene novine Kantona Sarajevo", broj 23/17), Vlada Kantona Sarajevo, na 21. sjednici održanoj 23.05.2019. godine, donijela je

ODLUKU

**O DAVANJU SAGLASNOSTI ZA IMENOVANJE
DIREKTORA JAVNE USTANOVE ČETVRTA
GIMNAZIJA ILIDŽA**

I

Daje se saglasnost Školskom odboru Javne ustanove Četvrta gimnazija Ilidža, da se Elvir Korjenić, profesor za fizičku kulturu, imenuje za direktora Škole.

II

Ova Odluka stupa na snagu danom donošenja, a obavit će se u "Službenim novinama Kantona Sarajevo".

Broj 02-05-21309-5/19

23. maja 2019. godine

Sarajevo

Premijer

Edin Forto, s. r.